

志餘卷十二

摭遺

郭璞在建鄴時有鼯鼠出延陵璞占之曰此郡東當有妖人欲稱制者尋亦自死矣後當有妖樹生然若瑞而非瑞辛螫之木也儻有此者東南數百里必有作逆者期明年矣無錫縣欵有茱萸四株交枝而生若連理者其年盜殺吳

興太守袁琇

晉書郭璞傳

晉元帝初鎮建鄴王導令璞筮之遇咸之井璞曰東北郡縣有武名者當出鐸以著受命之符西南郡縣有陽名者井當沸其後晉陵武進縣人於田中得銅鐸五枚歷陽縣中

志餘

卷十二 摭遺

一

井沸經日乃止

郭璞傳

齊武帝遣蕭嶷拜陵還過延陵季子廟觀沸井有水牛突部伍直兵執牛推問嶷不許取絹一匹橫繫牛角放歸其家

南史

蕭推字智進梁普通六年以王子封南浦侯歷淮南晉陵吳郡太守所臨必赤地大旱吳人號旱母死侯景之亂

南史

府西三十里奔牛鎮相傳梁武時於石城掘得一僧坐於土中帝以問誌公誌公曰此人定耳可令人於其旁擊磬則出定矣帝命試之果開目即向南而奔令人追之至此化

為牛因名

陳邑志

梁武帝大同十年三月甲午幸蘭陵庚子謁建陵有紫雲蔭  
陵上食頃乃散帝望陵流涕所霑草皆變色陵旁有枯泉  
至是而流水香潔辛丑哭於修陵壬寅於皇基寺設法會  
詔詔賜蘭陵老少位一階并加頒賚所經縣邑無出今年  
租賦因賦還舊邦詩

南史  
梁紀

中大同元年春正月丁未建陵隧口石辟邪起舞有大蛇鬪

隧中其一被傷奔走青蟲食陵樹葉略盡

南史  
梁紀

陳後主沈后婺華寡嗜欲惟尋閱圖史及釋典爲事嘗遇歲  
旱自暴而誦佛經應時雨降國亡與後主俱入長安及後  
主薨后自爲哀詞文甚酸切後自廣陵過江於毘陵天靜

志餘

卷十二 摭遺

二

寺爲尼名觀音貞觀初卒

南史后  
妃傳

陳後主因畫屏風敕通直郎蕭放及晉陵王孝式錄古賢烈

士以充圖畫

北  
史

高定公智周始與郝處俊來濟孫處約約共依江都百仲覽  
仲覽傾產結四人驩因請各語所期處俊曰丈夫惟無仕  
仕至宰相乃可智周濟如之處約曰得爲舍人在殿中周  
旋吐納可也仲覽使相工視之工語仲覽曰高之貴君不  
及見之來早顯而未躋高晚顯而壽吾聞速登者易顛徐  
進者少患天道也後濟居吏部處約以瀛州參軍入調濟  
曰如志擬通事舍人畢降階勞問平生旣仲覽卒而濟等

益顯 新唐書

高定公所善義興蔣子慎有客嘗視兩人曰高公位極人臣而嗣少弱蔣侯宦不達後且興子慎終遠安尉其子繒往見智周智周方貴以女妻之生子挺歷湖延二州刺史挺子洌渙洌爲尚書左丞渙終禮部尚書 新唐書

李封爲延陵令史吏人有罪不加杖但令裹碧頭巾以辱之隨所犯輕重以日數爲等級日盡乃釋吳人著此服出入州鄉以爲大恥皆相勸厲無敢僭違賦稅常先諸縣去官竟不捶一人 封字聞見錄

東坡在常州示疾徑山長老維琳來問疾與偈云扁舟駕毘

志餘

卷十二 摭遺

三

陵自援舊風曰君家有天人雌雄維摩詰我口吞文殊千里來問疾若以默相酬露拄皆笑出東坡畬云與君皆丙子各已三萬日一日一千偈電往那容詰大患緣有身無身則無疾平生笑羅什神咒眞浪出 王十朋蘇詩注

鄒忠公夢徽廟賜以筆作詩紀之未幾疾不起說者謂筆與畢同音蓋杜牧夢改名筆之類 陸游老學庵筆記

道鄉鄒公志完論立劉后疏有曰若曰有子可以立爲后則永平中貴人馬氏未嘗有子所以立爲后者以冠德後宮故也祥符中德后劉氏亦未嘗有子所以立爲后者以鍾英甲族故也今若賢妃德冠後宮亦如貴人鍾英甲族亦

如德后則何不於孟氏罪廢之初用立慈聖光獻故事便立之必遷延四年以待今日果何意耶必欲以示信天下天下之人果信之耶上怒甚內批貶志完新州疏留中不降出時人亦不知有何說也元符末崇慶眷方盛時相欲媒孽志完以固位乃僞爲志完之疏傳之中外其間有云殺卓氏而奪之子欺人可也詎可欺天耶卓氏何辜哉廢孟后而立劉后快陛下之意可也奈天下耳目何劉氏何德哉因指摘此語謂不可不明白下新州取索元本志完不知索之之由復申元稟不存諸人遂誣志完以爲實有此說詔令應天尹孫橐以檻車往新州收赴京師至泗上

志餘

卷十二

摭遺

四

哲宗升遐其事遂寢崇甯初將再貶志完乃先下詔曰朕仰惟哲宗皇帝嚴恭寅畏克勤祇德元符之末是生越王姦人造言謂非后出比閱臣僚舊疏適見椒房訴章載加考詳咸有顯證其時兩宮親臨撫視嬪御執事在旁何緣小人得人宮禁殺母取子實爲不根爲人之弟繼體承祧豈使沽名之賊臣重害友恭之大義詆誣欺罔罪莫大焉其鄒浩可重行黜責以戒爲臣之不忠者庶稱朕昭顯前人之意如更有言及者亦依此施行志完遂以衡州別駕

永州安置

曾敏行獨醒雜志

張正素先生善書嘗於其家見歐陽文忠子棐烏絲闌絹一

軸求正素書文忠明妃曲兩篇廬山高一篇

陳邑志

僧居甯毘陵人喜飲酒酒醉則好爲戲墨作草蟲長至四五寸者雖傷大而失真然筆力勁俊不專形似可謂稀絕每自題云居甯醉筆梅聖俞贈詩云草根有織意醉墨得已熟好事者每得一簞目爲珍物

陳邑志

宋張熹字子公祥符人高孝朝累官至同知樞密院致仕卒年七十五諡忠定亮節偉略史不勝書和議成充朝使謁河北八陵復命日泫然流涕不忍言但曰萬世不可忘此賊則諸陵之被發可知矣公故鄉旣沒於金遂寓居新塘因占籍營窳窳焉比南宋入元惡髡楊璉眞伽利諸陵寶

志餘

卷十二 摭遺

五

藏盡發之公墓與華藏山張俊墓俱被發公裔張洪憲言數十年前猶及見一石馬因立碑於空潭間山猶曰張山墅猶曰張墅墓猶曰張墓仍其舊也前志誤張爲章非矣

陳邑志

毘陵道士李褐性褊急好陵侮人有貧士詣褐乞食褐不與叱之貧者唯唯而去數日有乘白馬從白衣者七人詣褐因謂曰頗相記乎褐視其狀貌乃前之貧士也褐慚謝乃謂褐曰子修道未知其門而好陵侮人何道可冀子知有寒山子耶我卽是矣出門乘馬而去竟不復見

陳邑志

至正乙未春常多盜省府調兵捕之浙東宣尉司元帥嚴公

來總軍事未幾無錫平移軍武進一日擣禾富莊賊巢軍  
中失二馬明日賊乘之抗官兵烈塘上二馬聞金鼓來奔  
賊控勒不能止遂墮地馬立踉殺之官兵大捷烈塘之民  
咸神其事謝龜巢作嚴將軍戰馬歌曰往聞齊軍夜路迷  
老馬前導人追隨又聞的盧躍檀溪漢業復立西南陲古  
來良驥稱有德未有驍騰能殺賊將軍兩馬馱賊來雲霧  
四起生風雷紅綃帕首爾何物霜蹄一踣成飛埃軍前認  
主鳴且舞驚倒熊羆與貔虎羣凶膽落敢 追官軍凱旋  
槌大鼓馬兮馬兮誠有功須知感物由元戎將軍接迹武  
惠功煌煌史策書勲庸爾馬名示垂無窮

龜巢集

志餘

卷十二

撫遺

六

江陰王原吉逢嘗於常州軍幕中白免郡儒築城頓兵之擾  
凡百十戶座兵死骸骼辭幕職將投海上往別王左丞言  
馬蹟山漁商小船非攻守具得釋五百五十人數倍之

梧溪集

元時武進無錫江陰宜興四縣每畝實徵米五升三合五勺  
至正丁酉因大軍乏食權於武進宜興預借次年秋糧并  
徵一斗七合至戊申洪武元年常州知府趙良貴於無錫  
江陰兩縣俱照舊額武進宜興兩縣則并舊額爲預借之  
數作實徵未曾分豁嘉靖七年知縣丁謹入覲奏請減賦  
疏再上每畝得減米三升五合一絲

宜興縣志

胡忠安澗生時頂髮皎白踰月始黑其母夢僧入室因而誕  
育尋果有僧來求觀見僧卽笑僧曰此吾師吳中天池高  
僧也當時曾屬吾以笑爲證

萬歷野  
獲編

三王並封議起朝論大譁王所敬就學大學士王錫爵門人

也往規之爲流涕動以禍福錫爵慨然遂反並封之詔

金友

理太湖  
備考

宏治元年雲南按察使僉事林淮奏稱雲南路遠母老不堪  
就養辭官則家貧難供朝夕乞授本處或附近教授以便  
養母詔許之除淮常州府教授親終仍除僉事淮抵任未  
幾母死歸以過哀病卒

萬歷野  
獲編

志餘

卷十二

摭遺

七

宣德六年知府莫愚奏宜興舊貢茶額止百斤漸增至五百  
斤近年乃至二十九萬斤除納過尙九萬斤乞恩貸之上  
曰不意茶害至此令逋者免進仍於二十九萬中止貢其

半萬歷野  
獲編

嘉靖間馬蹟山有虎爲暴太守余公命捕獲之薛提學應旂  
爲作擒虎記曰東臺余侯守吾常之明年政平化治四境  
大安惟夫椒之野有虎勿靖父老胥造於庭以告侯曰明  
府下車威惠並著羣生成遂則旣受賜矣獨吾鄉僻在湖  
山虎尙爲暴晨夜罔敢出入林麓不便樵蘇遠近震駭搏  
者退避惟侯神明其謂斯何侯卽慨然曰有是哉吾在此

而虎毒吾民是抗吾也昔韓昌黎因鱷魚出沒瘴海尙欲操強弓毒矢與之從事而況茲虎在名山沃野獨能爲吾侮乎於是下令虞人往卽虎所虎乃怒吻迅形奮髯爍目人立而號聲震山谷草木偃仆若將向而前者虞人叱之曰吾奉太守命來若敢當我敢當太守乎虎於是乎垂首喪氣斂尾入羅遂縛之以歸獻於侯所侯值有事舟行陳之橫槊飲勞賞功歡呼戴道余適過焉相率觀之雖僵仆偃伏而雄軀偉幹鉤爪森牙猶凜然有咆哮之象也維時別駕霍曾二君咸在舟次謂余不可無紀余惟宋尙書守九江劉光祿守宏農而虎爲渡去史氏侈爲盛事然莫非

志餘

卷十二

撫遺

八

王土莫非吾民渡河出疆能保其無貽害於一方也哉孰與余侯搏而殺之若叔敖之斬蛇管輅之斷狐永除民患不尤快乎不然吾恐太山之側縱無苛政而婦人之哭且將有所不免矣雖然幽壑陰崖鬼魅生焉污池莽澤蛇虫窟焉惟侯之心事光明洞達如日白天青侯之政事平易正直如春溫秋肅此其所以妖踪猛跡自不能容而平康之福斯民其永有賴乎

方山文集

按余公前志官師表缺名通判有霍麟趾而無曾姓記言東臺余公以本省人爲知府明自中葉以後無之亦自可疑此當列祥異因已印成故附於撫遺

陳鴻漸字廷儀福之連江人景泰間進士官刑部山西司主事嘗奉命讞獄常州州人囊重賄欲賂之無敢通者其同事乃權要武臣鴻漸與之同寢處而委曲防之卒不得交

一言而去

入閩通志  
唐邑志

嘉靖丙辰島夷入寇由江陰犯我北鄙郡縣遣民兵禦之令省祭官張格督兵往乃格實怯不知兵也格子邦定願代父行倭善設伏邦定遇之於鄭陸橋方戰伏賊突自橋下起衆倉卒駭潰邦定不能支爲賊磔死格哀之請於府縣自立祠於和政門內祀之不久其子孫不肖鬻爲民居

唐邑志

志餘

卷十二

撫遺

九

嘉靖元年正月二十一日常州府學銀杏樹西南一枝忽火發竅中燄燄水不能灌至二十二日方止樹亦無害

戒庵漫筆

沈泄源太守應奎爲諸生時勇而負義婦翁邵方故丹陽大俠嘗爲高拱營復相張居正屬巡撫張佳允捕殺方并方子儀儀甫三歲婢邵氏視之捕者以日暮未發扃於室應奎將往救儀而府推官邀應奎飲夜分罷疾走五十里抵方家踰牆入婢以儀昇應奎匿之應奎晨詣推官捕者失儀毒掠婢婢終不言或告於守疑應奎推官在坐笑曰冤哉應奎夜飲於余晨又謁余也會有爲邵解者事乃寢

明史

列女邵氏傳

萬曆壬子江南巡撫徐檢吾民式以蘇松縉紳田產過多定役與齊民等故相申少師時行亦簽白糧解戶數名惟常州以理學之鄉優免如故事

萬曆野獲編

萬曆十五年至十七年游饑武進令徐圖以荒報熟民不堪命去日或爲脫靴賦詆之有五載遇三年之荒輒謂饑寒不由乎己一任收萬鎰之人乃云富貴自來逼人之句徐

後竟入名宦

陳邑志

莫方伯盛稱唐荆川詩謂直追沈宋嘗從公陳渡草堂夏月席藁不施茵帳卽白鳥嚙膚不顧也出則小艇一葉僅容一二人嘗語學者人有富貴氣於詩文必不佳又言近來

志餘

卷十二

摭遺

十

文章不以用世而媚世也名言哉

陳邑志

陸端惠初宰掖縣有王內使奉陳太后旨進香勞山海廟端惠遣二隸迎諸境上徑導至廟不令到縣意此輩必挾多資防爲盜劫或詭爲被盜爲地方累命巡簡率弓兵四十名赴海廟云衛內相也璫有戒心越日端惠詣廟禮海神已見王王索土儀回獻答以土瘠民貧無可獻有可獻者惜不能攜耳王問何物曰荒荒海上盜賊甚多爲我攜去良甚感也王笑而去

本家修  
廷獻

萬曆甲申邑試童生五千餘人府取送學道試者僅六七十名半皆巨紳子弟陸端惠完學與兄宣學與試府取宣學

擯端惠時四府遺童共走荆溪控院求大收學道房公寰素著風稜府縣不敢進一語諸童數千人鬩院院怒令捕之獲七人皆被責一童斃焉房心動出一狀式云某府縣遺童自信的係真才止因孤寒府縣閱文不公見遺乞收考并弔原卷如虛甘罪執結是實諸童見之皆懼而退投結者止百餘人試竟常郡遺童取二人首卽端惠次陳敏中皆令背縣府試原卷一字不爽始準補焉敏中次年舉鄉薦端惠遲十二年始獲雋又十年而成進士

本家修  
廷獻

昇東鄉莊楚園煦學士吳中行師也萬厯間郡丞祝眉壽聘纂郡志設局護國寺逾年稟成未及付梓郡丞解組去煦

志餘

卷十二 撫遺

十一

亦謝世稟爲里人憚應翼所得歐陽東鳳來守郡延唐凝菴太常鶴徵董之邑侯晏文輝以武進昔未有志併請創纂應翼與諸生陳邁湯桂楨任分纂晏侯遣使徵煦舊稿不獲無何歐陽晉秩去府志中罷而縣志告成四十五年知府劉廣生仍以郡志屬唐踵成之劉序有云歐陽守常時草略具然索之無獲已乃得之凝庵唐先生所蓋唐志

多本莊稿云

本莊氏譜楊廷  
鑑撰楚園行實

鄭峯陽鄭早從東林講學以孝聞於鄉里方六君子之下詔獄也獄生黃芝六英鄭作黃芝歌禍幾不測初鄭太公有妾頗擅寵而鄭太夫人奇妬素信二氏之教太公因假扶

此爲神言責數之且命與杖鄆方少叩頭泣請代扶贖母  
罪通籍後屢以直言忤溫體仁體仁思中傷之謀於中書  
舍人許某者亦武進人誣奏鄆杖母大不孝而鄆弟號四  
將軍者受許賂證成之鄆不忍自明以顯二親之過遂論  
死劉宗道黃道周先後上疏申救甚力爲體仁所持竟棄

市

陸繼輅合肥  
學舍札記

烈女杭氏前潢楊鉷聘妻宜興貢生杭校女也鉷父壙以校  
悔婚訟得直而貧不能娶尋卒校復以烈女他字烈女自  
經死陸端惠公完學時方爲諸生倡議乞旌校持不可端  
惠通籍言於同年錢司李卒以鉷孤弱杭氏子又以親諱

志餘

卷十二

摭遺

十一

撓之迨端惠官兵部復言於同年蕭大茹僉事諸杭猶曉  
曉力沮端惠爲具詞曰父懷愛女之心故辭貧而就富女  
矢從夫之志遂之死以靡它若非父愛誰成女烈於當年  
儻表女貞亦慰父心於地下諸杭見之始息喙卒得請特

旌如例

本楊  
氏譜

西溪叢語毘陵古寺壁間有雷書字一行云石牀侯十三人

火下有緒月二字緒月出佛書

陳邑  
志

普門大師惟安住祥符日許定宇中丞鼎臣張清惠公瑋入  
山問道丈室留飡卽大衆黃齏糠糲定宇曰弟子卽得張  
公初入道恐未諳此麤淡風味安擲糠糲起曰我非以世

法奉承檀護也今禪門鄙習已至不堪安得如大師者一

力挽哉

釋紀蔭宗  
統編年

崇禎元年戊辰廷策禮部進士時邑人莊應會卷已入一甲  
第三管紹甯卷已入二甲紹甯對策引正心誠意誠字右  
戈誤從弋上覽策親灑宸翰足成之輔臣李標頓首賀上  
悅因拔紹甯一甲第三名賜及第而應會改二甲第一明  
朝三百年間吾邑第三人及第凡六人首王儼次徐轄次  
陸簡次孫慎行次吳宗達次管紹甯

陳邑志

崇禎十一年三月十八夜郡侯陳公瑄夢一絳袍赤面神謂  
曰吾隋司徒陳某也郡人不德合有火災吾不忍桑梓蒙

志餘

卷十二

摭遺

十二

禍祈於上帝願燬吾廟以代今得請矣邑侯馬嘉植夢亦  
如之二十日午風雨大作辟歷震殿殿西角火起傾刻化  
為灰燼救者僅得帝像陳侯語諸父老曰帝既代民之隄  
民當酬帝之恩忍視宮殿毀廢乎乃勸捐重建宏壯勝前

本唐宇全重  
建西廟記

北都諸臣從賊者中多知名士闖敗紛紛棄賊南走希復用  
癸未進士宗灝崇禎時官中書舍人其一也廷議六等定  
罪有欲為營救者疏請破格用才即罪廢者亦可姑開一  
面疏下禮部議覆管紹甯持不可楊兆升助之事遂格灝  
等銜次骨乙酉五月南都破紹甯兆升相繼歸里時郡邑

令皆先遁邑紳有詣丹陽迎 大兵者灝從焉委知府事  
甫下車首督薙髮一城鼎沸四鄉兵隨起圍城者多管楊  
佃僕灝遂請收紹甯兆升駢斬於東郊季子廟前時六月

十六日也

節盧宜管  
楊合傳

順治初知府宗灝湖州人初爲筆客往來蘇常間工心計南  
都立資緣馬士英得官指揮鹵簿巡街意氣自得適管編  
修紹甯起用爲禮部侍郎遇諸塗白吏部黜之灝銜紹甯  
次骨以千金易美女迎 大軍豫王欲官之宗曰王平江  
南俾爲常守足矣金陵破蘇常望風歸順灝遂守常屠紹  
甯全家坑士儒千餘人搢紳皆重足立先是明天啟間白

志餘

卷十二

撫遺

十四

倉侍貽清爲璫所惡罷歸居東郊白家橋一日有游勾求  
食未饜肆詈無能敵者白出視勾虎頭燕頤叩姓氏則尙  
可喜也有投弗遇窮而勾食飲啖兼數十人數月未得一  
飽白爲具豚蹄斗米且贖以金曰遼左方用兵爾盍乘時  
自效尙叩謝去迨薙髮令下灝益暴白以石疊門冀紓家  
禍忽傳某王統大軍至橋下執居民問白所在發石徑入  
再拜曰昔年賤勾非公拯勿及此今願盡所有以報因勸  
出山白辭曰亡國衰朽不堪世用願老死林泉尙以巨金  
爲壽亦力却之固請所欲具述灝威虐士民喘息能易守  
所獲多矣尙憤曰賊奴敢爾命裨將往縛之俄頃斬灝西

門外剥其皮陳尸通衢士民稱快

翼駟  
稗編

順治戊子己丑間漕事大壞軍丁恣橫蠹胥因緣爲奸愚民脂髓俱竭功令五米五銀勒至十七銀未止愚民求兌愈急奸丁勒索愈橫甚者不待兌足竟離水次納戶買舟載米沿途交割率四五石而致一石稍不如意輒嘯聚數百洶洶欲爲變修撰楊廷鑑謂此不變計常民靡有子遺矣因奏記各憲以爲欲救漕弊務使軍不見民民不見軍非官收官兌不可當道咸以爲便著爲令傍近州縣倣而行之窮鄉之民辰而持米入倉午卽垂橐還舍漕困大蘇

以下

二則竝本楊  
殿撰行狀

志餘

卷十二

摭遺

十五

奏銷事起紳衿毫釐逋賦盡行解部其弊多由吏胥作奸串己全完冊仍開欠又不分別

旨前

旨後一概申報修撰楊廷鑑爲當事詳細剖<sub>析</sub>復爲同志披豁勸助一照冊開欠額如數代輸兩庠逋戶始得免械繫流離之慘時功令初頒他府縣學士子俱遵前例桎梏烈日中曝炙致斃者相望獨吾縣安枕高卧所保全又不可

勝計

乾隆間郡守胡文伯清廉慈惠而政尙嚴肅會大旱六旬不雨屢禱無應文伯曰天降旱災過由守令乃清獄訟禁屠

酤率屬宿廟蒲冠草履步禱諸神旱如故爲文禱於城隍  
神夜夢神謂曰此天意冥吏分卑何能爲後夜五更天甯  
寺門外有頎而長者鍾離仙也君挈以左手謁誠求之當  
可致雨越日文伯宿寺以待至時果有數句宿寺門外文  
伯伏地泣禱句曰我乞食者安知祈雨推欲行文伯堅執  
其手鄰行隨之句指曰雨至矣轉瞬失所在俄傾大雨一  
晝夜八邑霑足復夢神曰殆矣我以妄泄致雨干天咎後  
月某日將斬於東郊文伯曰守爲民累神願先期自殺以  
贖神曰無益也君能詳請速奏加封則免禍矣文伯寤立  
爲文申大吏入奏得

志餘

卷十二

摭遺

十六

旨加封威靈公是歲他郡皆災常獨轉歉爲豐文伯倡蠲修

廟至今神靈赫濯焉

翼駟  
稗編

趙恭毅爲浙撫時一日錢唐門外潮大至百姓紛竄公迎潮  
而進屹然不動潮作勢如相拒陡立千仞瑩徹如水晶屏  
幃閱一時始退公設祭禱之自是潮不上岸居民立石於

其地稱趙公止潮碑至今尙存

趙申嘉芸  
西雜記

有監司某延憚南田畫偃蹇不卽赴迫致蘇州拘繫聽事明  
旦將辱之一急足疾走至婁水乞援時已抵暮顛菴相國  
聞之以指擊案曰馬最速舟爲次遽跨馬以竹竿挑鐙縛  
僕背上去五鼓達郡城下門者尙未啟有頃入城直造監

司署力爭得釋東南士大夫侈爲美譚

六逸詩話

海甯范文園駮善相人謂武進周清原吳江徐鉞皆當不由科甲入翰林至己未同授檢討其言果驗先生嘗官副都御史疏請革鋪舍飭刑具又請直省俱立育嬰堂並得旨允行

聖祖仁皇帝嘗稱爲孝子

御書孝經賜之

李集鶴徵錄

康熙中犇牛鎮有萬阿雙者家貧不能讀書種菜自食性喜賦詩隨意口占動合天籟時東門外亦有二人失其姓氏相與唱和征還至則無以供客各攜乾餼席地坐誦其近

志餘

卷十二

摭遺

十七

作時或悲歌痛哭人莫識其意萬自姑蘇賣菜回舟次無錫云朝發蘇隄暮錫山桃花風裏放船還鳴榔罷處呼舟子划過浮橋便轉灣五言如竹暗遲明月窗虛納遠鐘皆

可誦也

毘陵謏聞

程文恭景伊爲禮部侍郎在班行中無所短長會 圓明園火舉朝大臣趨救文恭踉蹌入值火熄

上坐小輿出文恭跪道左請

聖安蓋先入者皆未得見也

上遂心識之翼日賞救火諸臣特命頒給由是邀

聖眷洵歷冢宰拜大學士爲一時賢相皆

純廟特達之知也 簷曝雜記

劉文定公舉鴻詞科 廷試五六天地之中合賦諸徵士不  
解所出多瞠目縮手公獨揮翰如飛桐城張文和公故睨  
公卷對衆朗吟始共得題解詩題山鷄舞鏡有句云似擬  
投林方截截戢戢可能對語便關關一時傳誦吳郡沈歸愚宗  
伯亦以諸生赴

召試未第頰首曰吾輩頭顱如許乃不如一白望後生得不

媿死 炙研瑣談

青浦王述菴嘗以要事繕奏稟夜半詣劉文定公門請閱公  
起難燭操筆點定時仲冬寒甚公呼三公子爲具酒脯而

志餘

卷十二 摭遺

十八

厨傳已空僅有白棗十餘枚以侑酒公亦自歎其儉陋爲

可哂也 蒲褐山房詩話

湯潯州大寶丁母艱服闋年未六十誓墓不出與里中耆宿  
仿故事舉同甲九老會乾隆甲辰

純廟六幸江浙率子紹業迎

駕於蘇州元妙觀 賞纒一端又以逮事祖父及見曾元賜

七葉衍祥扁額一時稱爲人瑞 亦有生齋文集

乾隆時楊星園煒知商邱民張景仲仇殺里豪十八人傷六  
人自投罪星園例免官奏上

特旨改革職留任蓋異數也嘉慶中官南昌知府以承鞠樂

平民朱夢蘭事與總督忤奏落職復蒙恩準捐復晉道員  
分廣東辭曰

睿廟諭曰好爲之但正已率屬道比府易爲也在粵前後十

縮司道篆以勞悴卒

毘陵  
謏聞

王漁洋懷人絕句云藉藉蘭陵四才子陳黃鄒董各名家謂  
陳其年維崧黃雲孫永鄒訏士祇謨董文友以甯也歸愚  
別裁集獨遺雲孫不錄漁洋感舊集亦缺載雲孫詩雅近  
才調集如後聞變詩云殉國昔憐嵇紹死謀身新羨褚淵  
生北極已懸新日月南陽誰問舊山河白浪連雲翻鐵甕  
青槐夾道冷金臺無家梅福青蒲淚非望劉歆赤伏符此

志餘

卷十二

摭遺

十九

哀南都之覆不勝故國之感

以下五則吳仰  
賢小匏菴詩話

訏士詩最工麗七言如秋色千山連絳水暮煙孤客上高臺  
淖家博士披香殿鄴下神鍼織錦宮竹林廢後悲中散蘭  
圃荒時憶左徒疲馬過溪時飲水敝輿逢驛欲更人燈因  
防虎千村黑溪爲驅牛一徑斜夾道雞鳴修竹裏層崖鶴  
響遠松間皆佳句也

文友詩沉着高華在諸子中風骨較健澄江雜興云立馬大  
江邊孤城倚碧天樓船三月火海島萬家煙白晝傳銀板  
黃金市寶鞭來朝聞閱武誰是請纓年

董東亭太史潮本海鹽人以贅於常遂占籍成進士卒年三

十六其抵家後書感詩云數載懷歸夢尙違卽今如夢却  
眞歸月明海上看雲立秋老江南逐雁飛親故幾人身健  
在田園先業事全非橫塘曾是行吟處舊種垂楊已十圍  
東亭饑驅奔走去住皆愁故發之於詩音韻淒鏘感人不  
淺

太史之祖贇於海鹽太史因占籍成進士詩話誤

洪稚存太史引疾歸里嘉慶四年

純廟升遐赴都哭臨以上書言事遣戍出關朝士多贈行之  
作以吳山尊齋一律爲最得立言之體詩云散髮江湖興  
有餘無端師友促登車竟忘太史無言責過恃愚忠類謗  
書 詔許自新天子大奏非直道小臣疏烏頭馬角期眞

志餘

卷十二

摭遺

二十

近記取聯吟會合初及 詔釋時京師方旱旋得甘雨  
御製得雨敬述詩紀事有納言克己乃爲民請命之大端及  
將原書裝潢成卷常置座右以作良規之註則又見  
帝恩之厚太史不爲不遇矣

洪北江以上書得罪遣戍伊犁將軍某妄測

聖意奏請俟亮吉至斃以法先發後聞得

旨嚴飭不行明年京師旱

詔減釋軍流不雨朱文正奏安南黎氏二臣忠於其主久繫  
獄請釋之又不雨

上乃手詔赦亮吉是日沛然雨遂頒

諭言天人感應之理至捷誠臣工弗以言爲諱

御製得雨紀事詩將其書裝潢成卷常置座右

國朝先  
正事畧

孫淵如以進士第二人及第授編修散館試厲志賦用史記

躬躬如畏語大學士和珅疑爲別字置二等以部曹用故

事一甲進士改部或奏請留館時和珅知淵如名欲令屈

節一見淵如不往曰吾甯得

上所改官不受人惠也遂就職又編修改官可得員外郎或

謂一見當道卽得之淵如曰主事終擢員外何汲汲爲自

是編修改主事遂爲例

國朝先  
正事畧

乾隆丁卯趙副使侗敦監浙江試有一生呼求換卷七藝俱

志餘

卷十二

摭遺

二十一

完而卷前後各書一好字如盃大問之曰卷完熟睡夢人

伸手入簾曰汝今科必中令於手心手背各書一好字不

料俱在卷上也侗敦曰好字於文爲女子汝自問平日有

罪過否生再三哀籲換卷另書

汪輝祖病  
榻夢痕錄

乾隆辛酉朱竹垞典江南試得一卷文甚雅健二場復工絕

已置領解七日以三場卷不至促之監臨云已失竹垞爲

之驚惋泣下愛其文錄置行篋越數年偶示徐學人永宣

學人曰此吾師陳鍊之文也竹垞驚喜出望外復爲序其

詩古文辭甚稱道之

本六逸  
詩話

乾隆庚午趙甌北翼舉順天鄉試至嘉慶庚午總督廣厚等

以循例重赴鹿鳴奏請奉

上諭趙翼著賞給三品頂戴准予重赴鹿鳴筵宴甌北時年  
八十有四有紀 恩詩曰布帆安穩出橫塘隄柳纔秋葉  
未黃此去不須三寸筆重來已是滿頭霜也勞送別如征  
客豈尚求名赴舉場聊比看花踏陳迹元都前度老劉郎  
曾叨

先帝舊朝臣久作還鄉賀季真敢望 紹庭收廢籍再蒙進  
秩換華紳青雲一榜新先輩黃髮三朝古老人回首平生  
數歷處翻教感切淚沾巾海內名流屬和甚富

毘陵  
謏聞

黃載華字璞山力學負文名嘗試京兆僮奴誤以書雜置筐

志餘

卷十二

摭遺

二十一

中載華遽攜以入搜檢者啟得書遂交刑部載華茫然不  
知書所從至僮奴聞亟赴部自陳尚書金光悌知其誠慮  
無以訓後載華曰某固素熟此因背誦終卷不誤一字光  
悌以聞得白後舉鄉試成進士

崇百藥  
齋文集

雲溪之秀甲於郡中環溪皆名族所居前哲胡芋莊詩曰  
皇朝五十有七載出四公卿兩狀元四公卿爲大學士呂公  
宮尚書趙恭毅公申喬副都御史徐公珙工部侍郎周公  
清原二狀元卽呂公及外曾王父趙侯赤先生熊詔也芋  
莊作詩後不及六十年又出三公卿一狀元三公卿爲協  
辦大學士劉公於義司業莊公楷侍郎莊公存與一狀元

則侍郎之弟學士培因其他官侍從擢巍科者又不一而

足可云盛矣

洪亮吉外家紀聞

惲子居敬令江右擊斷之晨坐齋中抱牘吏進差肩立子居

手畫口指毋留其應聽者翻竟卽擲下如風雨已坐聽事

問數語書牘尾輒數十行張臯文過縣曰此酷吏也子居

大駭求其說臯文曰凡天下以易心言吏事者與手殺人

一間耳不意此事近出吾儕子居聞之爲之媿汗

大雲山房文稟

畢秋帆宮保沅初不識黃仲則見都門秋思詩謂值千金姑

先寄五百金速其西游好事惜才亦佳話也

春芹錄

乾隆丁酉戊戌間趙懷玉莊燧湯大奎楊望秦莊炘汪廷杖

志餘

卷十二

摭遺

二十三

爲眞率會號飲中六友

亦有生齋文集

錢文敏爲工部時監五城平糶鄉民某挾錢來糶某甲竊之

泣告文敏卽廠所盡搜糶者甲已獲米而錢有餘綜其數

與某所失符詰之甲不服曰吾以市他物耳文敏拘二人

潛遣役至甲家給曰甲來糶失錢已有攫之者得一言證

其數乃給米耳甲妻以實告役返甲乃服罪

竹初文鈔

楊芝圃刺史瑞蓮依其戚梁文莊詩正於京師乾隆間以能

篆隸書薦入篆字館供事一日有偉人微服至瑞蓮不知

誰何漫捐之上座問館中人皆何往瑞蓮曰赴闈鄉試矣

曰子奚獨留曰恐不時 內廷有事傳問故未往因詢姓

名籍貫何人引進具以實對索觀所爲書極稱賞之語頃

二內侍至方知

駕幸亟蒲伏叩頭

上微笑去次日

上語文莊曰汝戚楊瑞蓮篆書旣佳人亦誠實因在館當差  
不及預試著賞給舉人文莊叩頭謝未幾以議敘銓授湘

潭令頗自貴重其書迂巡撫被劾

上曰楊瑞蓮朕所素知著擲還原奏後擢知州引疾歸

翼駟稗編

陸劭文耀適客西安得二石劾皆新出土者一題大隋故朝  
請大夫夷陵郡太守太僕卿元公之墓誌銘其一大隋故

志餘

卷十二

摭遺

二十四

太僕卿夫人姬氏之誌卽元公配二石同一人書蓋歐虞  
之所從出而非歐虞之所能到鋒穎如新洵可寶也

本合肥學

舍札記

按二石兵後殘缺仍藏陸氏雙白燕堂

莊繩祖爲交城令有少女殺於野繩祖集村人履勘有某某  
者視速脣動繩祖召女父母問識此二人否曰是日黎明  
實見二人共踞高阜繩祖曰必殺人者內怯偵於此耳嚴  
詰之果女不受汙被殺燕某縊其妻及弟妻誣鄰威逼至  
則二婦共縊一索足離牀二尺許牀右設木榻繩祖猝問  
曰榻非舊在此乎婦由汝死何誣鄰爲燕堅不承繩祖曰

果自縊必有承其足者非逼之使縊抽榻而何燕語塞蓋  
二婦皆不謹燕故欲其死仇鄰而誣之也

亦有生  
齋文集

楊稷爲會甯令偶出見瞽者挈少婦行瞽貌獷惡而婦容甚

戚執訊具服蓋婦家靖遠從父就食他邑與瞽偕行瞽似

盲實見殺父古廟中偪婦爲妾至是伏法

亦有生  
齋文集

徐大榕知泰安府有泰安民張承宣爲張培嗣素不善於父  
母培與妻朱及張成文等共勒承宣夫婦死移屍桑園以  
自縊聞又誣縣學生與承宣婦通爲培夫婦猝遇媿而自  
盡大榕核而疑之移獄親讞得實縣仍執前讞不從別委

檢驗迨發棺傷與所指符乃抵培等罪

同上

志餘

卷十二

摭遺

二十五

孫淵如官刑部時遇有疑獄輒依古義平議所平反甚衆甲  
有竊主財逾貫詣其友乙匿其數以告分金而逸事發乙  
得知情藏匿罪人罪應流淵如謂律稱知情則坐乙不知  
滿貫也應以所知數坐減問徒尙書詰以乙所言無質證  
如獲甲言實告以逾貫奈何淵如曰此名例所謂通計前  
罪以充後數也乙卒減徒湖廣有子護嫁母傷人至死獄  
下法司議或以嫁母期服減於母則護嫁母不得與母同  
科淵如謂古者父在爲母亦期屈於所尊嫁母服期因宗  
子主祭非謂情富殺也引宋王博文請封嫁母文爲行服  
謂子無絕母理又引唐八座議凡父卒母嫁有心喪三年

之制子無絕道故也護嫁母出母均當與母同議減罪權  
山左臬七閱月平反數十百獄活死罪誣服者十餘人亦  
不以之罪縣官曰若輩豈盡明律甲與乙有姻共飲乙醉  
墜火炕吐燒酒引火燄灼爛至死甲醉卧不知讞者以甲  
奪壺斟酒有爭鬪形擬鬪殺罪淵如曰甲主乙賓奪乙壺  
勸之飲名奪實讓也改甲坐過失殺出其罪

國朝先  
正事畧

阮文達元左遷編修充 國史總纂爲張皋文惠言作傳入  
儒林後出撫江西有某尚書者以皋文所著書背朱註去  
之一時士論大爲不平欲偕皋文弟琦徧詣諸史官爭之  
琦曰先兄宜入儒林與否將來自有定論若如此求入卽

志餘

卷十二

摭遺

二十六

與奔競何異非先兄意也此可謂能知其兄也矣

者  
合肥學  
舍札記

莊軫字叔枚父鈞濟南知府有子甚慧而殤父哭之哀良久  
忽張目曰阿父勿悲後三年某月日當復來及軫生如其  
言鈞官大名知府值歲大歉饑民呼噪求振鈞謁道請發  
廩歸語家人而歎軫時九歲遽前白曰大人能棄此官卽  
自檄行各縣耳鈞聞言以手繫案曰善亟從其言全活甚

衆亦未獲咎

合肥學  
舍札記

陸恭城廣霖歸自粵西年六十矣與兄弈清偶持論不合奕  
清怒廣霖長跪謝適同里某公過訝而問故驚歎良久懽  
然曰我誠非人因探懷中出片紙示廣霖則訟其兄之辭

也廣霖笑而毀之并招其兄至留飲極歡而罷

毘陵  
謏聞

宜興朱銓精相地術嘗過郡元妙觀一日向暮有人詣觀求宿觀主鄙不納銓納之夜分銓猶秉燭觀葬經宿者起視之曰君好此耶然徒此無益銓因求教宿者搜奧窮微語極元妙遂與同榻比曉關尚鍵已失之共訝爲仙銓自是

技益神

宜興志  
軼聞

莊蓀服編修令輿先於康熙丙子以蔣璣名中式後以頂冒被黜至壬午以本名納監試順天爲五經二十三藝監試特奏

賜舉人丙戌成進士後其孫綸渭經畚並以五經獲雋編修

志餘

卷十二 摭遺

二十七

典試浙江卽假歸奉二親於雙松晚翠軒侍奉之暇飲酒賦詩一時有神仙之目書門聯云五經三榜四世一堂洵

紀實也

毘陵  
謏聞

莊南村柱與錢鑄庵人麟爲中表兄弟莊官溫處道適所屬大饑人相食莊請發帑十萬糶米臺灣以振之大府以臺灣遠隔重洋往返稽時萬一漂沒帑歸何着駁斥不行適鑄庵來訪南村正深懊悶神情索莫鑄庵怒曰至戚遠來未必分潤官橐何遂無中表情南村告委曲且求策錢曰君爲監司視有便於民者能辦則辦何必拘拘稟白君果出帑吾當爲赴臺南村大喜啟庫出銀昇之卽夕首塗南

村夜宿城隍廟禱於神曰幽明同有民社之責如不忍數百萬生靈就死願賜帆風俾米速至未半月鑄庵市米百餘萬返數郡賴以全活鑄庵文敏公維城父南村二子後

俱登鼎甲

莊氏譜  
盛事類

莊南村柱夫人嘗經鶯脰湖舟火從者悉他避惶遽間見修隄一線浮水面挈二子上遂達岸隄亦不見須臾從者操舟至無恙大喜岸次獲梅檀三官像奉歸敬祀之後爲建三元閣二子長卽侍郎存與次殿撰培因也

翼駟  
稗編

雍正中京師地震莊方耕侍郎隨宦大興所居屋已領尋侍郎不獲發之兩牆對合如龕侍郎在其中猶熟眠未醒也

志餘

卷十二

摭遺

二十八

時侍郎夫人吳亦隨父京邸方震時聞梁木格磔聲急避桌下屋傾壓賴桌撐拄得無恙一時鄉人官京師者謂二人他日必貴遂爲兩家締姻焉

同上

錢文敏夫人金氏年十一母楊淑人命賦月中桂口占二語云天上金枝原有種人間玉露總無塵以吟詠非女子職故讀書淹雅而不以才著文敏爲浙江學使值

高宗南巡夫人偕三品以上命婦迎謁

皇太后召見行殿奏對良久儀度安雅

皇太后顧左右曰此眞狀元夫人矣目送之出

竹初  
文鈔

故事狀元夫人登城撒穀一甲第二三名不與焉雍正庚戌

狀元周霈探花梁詩正俱浙江錢塘人有司固請探花夫  
人無狀元夫人同出時惟梁尚有母故止兩夫人登城乾  
隆乙丑狀元錢維城榜眼莊存與俱武進人有司援例以  
請兩家各有母且兩太夫人爲姑嫂俱率子婦登城撒穀  
一時傳爲佳話後九年甲戌莊母次子本澹學士培因魁  
天下時學士配彭在京邸有司遂專請莊母撒穀一人兩  
膺榮遇爲前此所未見

毘陵  
謏聞

莊南村觀察由詞林歷官副憲有美政子二人兄弟先後鼎  
甲乾隆丙子方耕宗伯典試浙江本澹學士以修撰典試  
福建同時引假歸省錢文端公陳羣贈聯殿上卿雲傳兩

志餘

卷十二

摭遺

二十九

見膝前天使喜同歸一時搢紳侈誦

同上

莊本澹學士配彭氏雍正丁未會狀芝庭先生啟豐女也九  
十壽時梁山舟學士聯云三從兩冠傳臚榜百歲初開燕

臚傳

喜筵雅切爲士林傳誦

同上

董經元家寨橋嘗自郡歸見遺金釵裹一質劑堅守之日且  
暝有人蒼皇攜燭至叩之良是因舉畀之其人感泣固請  
姓氏經元勿告其人滅燭尾之識經元家訪其隣曰是固

蔣孝子嘗刲肝療父疾者

亦有生  
齋文集

孝子顧某中右廂人業紙燈事母至孝母樓居孝子處於下  
一日鄰屋火孝子急登樓負母趨避火猝至不及下母子

俱死時道光壬午正月十三日也翊日鄰人於灰燼中求

其尸母猶在背也

芸西雜記

嘉慶二十三年大臣以諫

東巡謁

陵多得嚴譴龔御史鏜繕疏赴 圓明園啟奏

上震怒諭侍臣曰鏜欲學楊椒山耶何膽大如是尙書某對  
曰鏜見居松筠庵爲明臣楊繼盛故宅在宣武門外殉節  
後士大夫建祠祀之

上威漸霽疏留中無所問由是龔御史之名播中外

毘陵謏聞

董華星達存精六壬奇門相宅尤奇驗江蘇巡撫莊有恭延

志餘

卷十二

摭遺

三十

相節署華星爲改葺數處旣落成有恭將出視事華星止  
之爲擇一吉日時而出至時出坐甫定門外忽傳鼓報加  
宮保之信適至康藩伯令昭文以家有子弟應秋試預叩  
華星華星問先塋何嚮教以某方立一鐙竿子弟中某年  
生者當發解已而果然他奇驗多類此人皆稱董仙翁

詹曝

雜記

暘邑令張丹村作楠精籌人術嘗以所著小籥錄乞序於趙  
味辛味辛屬鄒潤安澍代草以進丹邨咤曰吾交味辛有  
年不知其精是也訪之趙具以鄒告丹邨卽日訪潤安坐  
斗室中與論古今天官家異同得失久之丹邨出歎曰邑

有是人而吾不知吾慚爲令矣

薛子衡真正  
銘齋文鈔

賈人張氏女適婿汪某其姑強與人通不從毆殺之告於女氏曰於律毆死子婦無死罪卽訟必毀而家事以不聞劉禮部逢祿爲作張貞女獄議略謂康誥父不慈子不祗不予我政人得罪天惟與我民彞大泯亂曰乃其速由文王作罰刑茲無赦言不孝不慈其律均浮於元惡大敦也春秋之例不得專殺有罪白虎通云父殺其子當誅何言天地所生王者所教養父不得而專也禮喪服爲舅姑服期傳謂從服蓋以人合其恩輕於父子古律父殺子之罪且重於平人況以媯姑而戕貞婦乎後讀律例駁案乃知

志餘

卷十二

摭遺

三十一

純廟已有駁例俗吏不知遵用爲可慨

劉禮部集

趙可兒故陸氏婢也從嫁於蔣莊兆麒娉爲妾憲幕楊峒山者見而欲奪之莊幾爲所挾蔣持不可卽日遣歸莊可兒猶懼有變攜利翦置袖中而自書其腕曰莊春庭妾趙氏

春庭者兆麒字也

合肥學  
舍札記

道光時有節婦守節九年而故者乞旌以格於年例費御史庚吉爭於尙書汪瑟庵瑟庵曰汝以說來則可奏庚吉援筆書曰飲冰茹蘖已歷九年以實陳情決非緣飾是其年之不幸非其節之不終云云瑟庵賞之遂奏爲定例又創

爲總旌之議竝見施行

毘陵  
謏聞

乾隆三十五年

皇太后八旬萬壽凡六十以上齊眉命婦均得邀綵緞珍品  
之 賜漢臣中同時受 賞者吏部尚書程景伊妻金氏

預焉闕閱閨闈傳爲榮遇

本陳康祺  
郎潛二筆

郡城顧塘橋北相傳梁宮人藁葬處道光初蘇州計某寓湯  
氏宅一夕月色如畫計卧醒忽聞細語嚶嚶類女子起窺  
之見二古粧麗人長者年三十許少者可十六七長者曰  
子夜月色奚似景陽少者曰不如計遽出并謝唐突二女  
欲去再三挽始就坐徐叩生平少者曰妾梁代宮人鵲紅  
十七殂長者爲華芝給事永甯公主公主死以天監八年

志餘

卷十二

摭遺

三十一

葬華芝殉同瘞此耳由是花月嘉夕輒至與談梁宮舊事  
多與史不合昭明之死由元帝思奪嫡屬僧宏智素饌進  
毒武帝覺之故立簡文爲儲其後讐訾元帝相讐蓋有積  
釁溧陽公主本邢妃所生抱養宮中朱異母少時曾給事  
武帝與之有恩故寵倖無比此並記載所無

本翼駟  
稗編

乾隆丙午大旱河港赤裂居民多赴淹城濠中掘黑泥和麩  
作餅相傳此城本沈法興聚糧處年久化爲泥也鄉人掘  
他河底至五六尺許輒得泥如石炭者然不可食以作薪  
火乃終日不熄其質非土非石有大至數圍又有疊成出  
縫層層可揭者細驗之則大者本巨木層疊者木葉所積

年久成出也

簷曝  
日記

陽湖縣城隍廟廊廡間舊有泥塩立像阜衣方巾扁云劉雲山像劉故前明醫士不得志自塩立像捨身廟中百餘年來殊鮮靈異呂紹宋家人有吳善者左臂患巨創醫不效忽有道人挈布囊至自云能療出刀割創痛楚若失酬以錢不受問其姓曰劉與爾隣故來相視言已飄然去訪之無其人偶至廟見像恍然曰是矣繇是屢著靈蹟有道士爲雜戲者吞鍼一撮竟下咽稽首像前夜臥焉有人言清晨出門見黃色物儘飽食之愈晨出見薑菜花盛開如其言旋歐吐鍼隨花出呂嫂少時患失血甚危夢語以天竹

志餘

卷十二

摭遺

三十三

子煮湯常飲一月而愈其他靈異多類此乾隆三十七年殿災劉像仆地腹中有字蟲蝕過半但存嘉靖某年四月二十四日生數字紹宋先人書十六字云妙術濟世自昔及今仙師之靈永在人心并原紙藏腹中塩坐像響應如舊今殿旁有崑祠榜云劉雲山仙師之廟

本呂紹  
宋記

嘉慶十四年三月初九日常州府學大銀杏樹腹中忽發火從隙處迸出青綠色有四五蛇冒火出初十日辰刻方熄

樹仍無傷葱鬱如故

簷曝  
日記

嘉慶間孟瀆漁網得一龜徑二尺許背有大唐天寶七年五月三日奉敕放於凝碧池小字一行用銀絲嵌入甲裏畢

蕉麓涵以錢千易之不三日逸去

翼駟  
稗編

吾郡古號龍城龜爲龍種以城有六門形似龜相傳北爲首  
南爲尾青山門外有城如半月爲食盆二井爲眼兵後湮  
失其一同治乙亥里人湖南知府劉浚得於民家廢址濬

復之

以下三則竝  
毘陵謏聞

左廂顧塘橋北有顧塘尖相傳爲文筆峯向係官地應請免

科

江北某同治間奉母僑武進德澤鄉作小負販於循理鄉小  
新橋拾得路遺銀物守俟二日失者至悉舉畀之酬以金  
不受而去

志餘

卷十二

摭遺

三十四

小北門外墩河左近舊有華表石闕相傳爲宋李公若水墓  
公母之墓亦在焉按舊說載兀术於黃天蕩敗走時夜至  
民家遇公母驚訝而去是公母於公死後亦避寇南下矣

以下三則竝莊

詠簾校勘記

小南門外石塔有高阜土圮碑出爲三國時吳將軍黃蓋墓  
吾邑舊有蔡邕墓詳載舊志後之修志者疑之按溫庭筠詩  
集註中明言邕墓在武進尚宜鄉據此則舊說非附會矣  
懷德北鄉新闢下塘巍然大冢俗名王墩舊志載道光間土  
人於墩旁鋤出一小玉碑上篆云諸葛子瑜之墓案此碑  
及搨本均未見在當時或亦得諸傳聞吳志瑾卒於公

安奉賢志載明天啟時樵人創地得諸葛瑾墓碑 國朝

雍正間奉賢知縣舒慕芬重爲立石郡人許棫有詩曰忠節危疆寄荒碑縱斧餘人尊諸葛虎魂戀武昌魚江火空

連壁滄桑問故廬如何臣主契歸骨異邛墟

毘陵 謏聞

舊志載武進循理鄉龍窟蕩有 國朝鄒副使忠允御史光

濤墓兵後竝失所在徧訪不獲鄉人偶設乩壇叩之土地

神一一乩示其處遂得之

毘陵 謏聞

孫某伐其石塔祖墓古樹匠鋸之甫數寸忽大風揚沙蔽天

日人皆偃伏樹連根自拔而踣有黑團纍纍如蹲鴟諦視

之皆孫氏死者之髑髏鬣髮其上也孫氏由此日替

芸西 雜記

志餘

卷十二 摭遺

三十五

湯貞愍母楊夫人年十四隨父官昆明父賜之玉釵于歸後

偕其夫侍翁官臺灣林爽文亂翁殉節夫亦殄焉後貞愍

奉板輿之官揚州釵斷於瓊花館夫人作二絕紀之有三

十九年千萬路鬢絲絲斷玉還溫之句爲世傳誦後貞愍

殉粵逆之難

以下二則 陳康 祺郎 潛三筆

乾隆某科惲子寬敷就大挑監挑大臣某公以揮音呼其姓

敷復朗聲自呼以正之遂屏不入選越數年復預大挑主

事者爲 成親王見惲姓卽驚喜曰是南田先生後人耶

亟予一等同爲大臣而雅俗相區如此

道光間崇法寺新鑄大鐘成叩之不鳴扃置一室湯貞愍貽

汾偶至寺怪焉僧具以告貞愍擊以馬箠忽大鳴嗣是他人叩之無不鳴者貞愍因作鐘寺紀緣圖海內名流徵詠

殆徧

以下二則竝  
毘陵謏聞

武進吏沈某有榦材善心計致富其子購南門外陶園園爲明唐襄文公別業有泉石花木之勝嗣歸陶艾圃先生自悅故又名陶園石刻孫文介公書荆川先生讀書處七字嵌於壁有調沈者令易沈某學稼處其夕夢古衣冠者數之曰何物老吏敢污吾壁以象簡擊之其子旋疽發背卒亟還其舊兵後尙存同上

天甯寺僧定果有梵行兼通儒術

志餘

卷十二

摭遺

三十六

純廟五次南巡迎

駕賜賚優渥定嫺於詩文而拙於書與李檢詩英交最契李善書定見其揮毫染翰心羨之李年五十無子祈於寺定謂之曰明年此際必生子及期定謂衆曰吾世緣已盡今去爲李翁子跌坐而寂李於是日生男名慶來生而穎慧六歲能擘窠書十一冠童試負書名五十年以明經終

翼駟

稗編

郡人許忠偶附商舶涉洋妻爆蠶豆數升置枕中許不知也至某國許破枕得豆爲舟人所見駭曰此禁物夷甚貴重之卽熟每顆尙可易番餅一枚因悉出豆易金錢甚夥返

郡出百金樹天甯寺旛竿以報神貺既益多市以往至洋風浪大作兩龍攬舟幾覆悉投之海龍始去許歸貧如初

上同

乾隆初一僧不知何許人口操西音無寒暑一衲手竹杖散髮跣足兩鼻塞以絮往來諸寺院時道人禍福奇中與之食卻去冷飯殘羹則以衲承之行且啗宿古墓叢薄間或在天甯寺廊廡下好事者夜窺之卧且起繞柱舞杖作圈形口喃喃誦咒去鼻中塞出白物二取樹上露洗之已復納入在常五十年容常如昔甲辰春入天甯寺向佛如語至殿廡趺坐而寂寺僧爲瘞像祀之

伍宇澄飲  
淥軒隨筆

志餘

卷十二

摭遺

三十七

郡吏徐旭娶三年喪偶鬱侘無聊隨某令流轉至酆都貧不能歸偶遊南門外行十許里天色昏慘白草黃沙彌望無際悵然欲返遇故役馮某駕囚車至因與同載至一城忽見其妻下與語相將入室妻言嫁閩羅前牛頭卒語頃卒至兩手除牛首如巾幘然則白哲少年也妻告以徐至卒詣見甚恭曰鬼饌不可飼人出市酒脯飲嚼歡洽如故徐欲一觀地獄卒諾之食已仍戴牛幘攜义前導歷諸獄怵心駭目有溪水赤如血婦女哀號其中徐曰此皆產婦乎卒曰產育天地生化之常奚罪焉世之主虐婢嫡虐妾繼母虐前子女姑虐養媳生前慘毒死罹此酷報遊畢返留

信宿卒言明日將解惡僧十八人之常便可送歸天曙呼徐起門外車已駕有諸僧縛置車中卒與徐同御行若數里許日至矣驅諸僧由犬竇入母啟戶見徐怪之具述所遇是日家有牝豬產十八狇徐後於天甯寺剃染爲僧

本翼

駟稗編

方伯查公文經守郡勤聽斷日坐堂皇觀者頌神明民有訟不之邑而之郡政成門外居民某甲取婦甫一月託父母於其婦而遊蜀歷數歲不反家貧婦竭力織作以養鄉里稱孝會洊饑翁死婦百計稱貸營斂葬姑繼亡鄉人皆餒莫能助婦不得已遂自鬻以葬姑有蘇乙者富而多妾媵

志餘

卷十二

摭遺

三十八

年六十無子出金購之婦喪盡孝既畢乃醮逾年生子久之甲負重資歸鄉人告以故甲謂婦雖失身能孝事翁姑於我有德必歸之遂詣蘇請贖乙曰吾老矣呱呱者不能無母靳勿遣訟於郡公謂兩造各有辭理吾不能牒而與焉是宜決於婦立書片紙付隸及女役往曰婦固非節顧孝其好挈之來甲與乙立歿之有頃隸奔返白婦媿恨且侵暑病危公命偕醫復往曰弗瘳不汝貸逾時隸復返曰勿克救已公怒與杖訖召甲與乙曰若二人可無爭矣尸孰歸甲泣曰民爲父母故願得其尸問乙乙無辭公令各書狀已曰婦亦可愍宜賞十金以市棺復曰婦猝死可疑

其昇尸來驗隸繼往輿婦至闐然出踞堂下觀者大訝隸白婦復甦公喜令甲偕返乙欲有言公曰若旣願歸尸於甲死生一也尙何辭以市棺之金賞隸役甲與婦泣謝而去蓋公書牘卽授指僞爲婦病而死者甲與乙皆不知也甲訟丙負逋錢十緡索不與公問丙曷不歸曰貧問甲曰信乎曰然公曰吾爲若償其半餘約數時畢歸命庫與銀如所負之半甲拜謝去不逾時公命役復召甲至曰官償民債後有訟者吾何以濟命返銀甲置諸案而絀太半焉公問故甲赧然頸赤不能語公將笞之甲懼叩地曰已酬某老師矣老師者民俗呼官隸之稱也公詰役乃出銀

志餘

卷十二

摭遺

三十九

公曰吾爲若貧故償之爾更攫焉是真虎狼不若矣宜予大杖褫役隸求貸公勿許再三乞公曰然則悉爲丙代償隸如命與甲而去還銀於庫由是吏役凜凜焉 公斷事縱民觀聽有擔釜於市者託於門外無足之句許謝以資而入觀焉迨出檢釜亡其一訟於庭公詰句胡匿其釜句曰小人足病癱跲行日不一里其何能竊負而逃逃而復至公曰然是市釜者欲不與資而誣海竊釜耳命役擇釜之大者賞之句頓首謝戴釜於首匍匐下堂公令返曰汝法良善必汝匿將杖之句恐以實對則匿而寄於近者令取之固失者釜也立還之

毘陵  
謏聞

唐顧汜善八分兼工小楷開元中同韓擇木蔡有鄰應召爲國子書學生三人更相入直元宗命諸王宗其法日與杜甫輩放歌豪飲於長安市見聚羶聲利者輒衡目唾地故仕途多踣天寶亂奔走湖湘川蜀困衣食士多憐之稱爲顧文學先生亂定歸隱橫山劉長卿過其廬嘗以詩贈世謔爲贈况云

高山志以  
下補錄

案杜工部送顧八分文學適洪吉州詩注引東觀餘論歐陽集古錄俱作顧誠奢高山志不知何所據仙釋傳引唐李絳尚書故實顧况字逋翁善文詞兼工小篆嘗求知新亭監人詰其故曰予欲寫貌海中山耳因辟善

志餘

卷十二

摭遺

四十

畫者王默爲副况志尙疎逸有時宰招以官答詩曰四海如今已太平相公何用喚狂生此身還似籠中鶴東望滄洲叫一聲後吳中皆以况爲得道解去是則汜况原屬二人前志不載或高山志據其私譜纂入耳

宋嘉祐二年王介甫知常州興人徒數萬開運河會秋大霖雨民苦之多自經死役竟罷

陳邑志

宋英宗治平元年毘陵日晡有大聲如雷電一星如月出東南再震移西南三震星隕在宜興岳亭許氏得拳石其色如鐵郡守鄭伸取以遺潤州金山寺

沈括筆談  
宜興縣志

明成化七年七月十七日大雷電有物騰起西漏湖東至太

湖馬蹟山拔木壞民居百餘所被災之家柱倒植而瓦甃

不毀宜興縣志

荆溪陳丹心館孫文介公家冠一敝巾無寒暑衣布二層朔

風大雪獨露坐崖岸上善飯常茹蔬間食糠覈麥麩天啟

元年春尸臥六十餘日日飲水二甌鬚鬢鬢黑有光體隱

隱有香氣至家月餘卒後文介在邸有老儒敝衣冠貌類

丹心投僕一書欲寄其子所言盡經術家國事

元晏齊文鈔宜興志

方外傳

明殷萬字振東因其父與諸父素不睦萬設飲延諸父奉觴

踞請曰大人育不孝輩多而使無以效法奈何於是諸父

志餘

卷十二 摭遺

四十一

感之遂相雍睦

高山志

明謝元吉清修好善一日病篤昏迷若死者五日夜而醒初

若以被自覆滿前黑暗止有左腋下光明一道隨往聞牝

豕聲人語云第十三豬子不育元吉知墮惡劫急返則入

一人胎見產婦年三十餘與姑居夫客授在外家甚窶不

願留復行又入一胎其家稍勝前又行人一富家已又入

貴家如是遞轉乃至卿相家祇思歸於是入龍宮見珍寶

炫目云作龍王第三子又不願遂昇忉利天已復昇一天

忽有光見己立荷花旁大士見於花上語之曰汝有夙緣

當令汝返陽元吉未即返又上一天見諸阿羅漢謂曰此

地終爲汝處元吉遂還其家植金蓮寶相花凡植之家無  
有花者夢人語云來年六月十三日此花當開明年夏果  
花其種莖葉如芋而員大過之花色白發於莖若九指參  
差而出日放一瓣香殊清異至六月十三日計之恰十三  
放矣又明年夏復花

高山志

相傳陳司徒杲仁被害後白晝現立雲端彎弓注矢鏃射法  
興立殪後人壯其事於公死日作雲車弔之雲車者冶鐵  
繚繞如雲上承小兒操戈戟若戰鬪狀有力者負之趨流

傳至今日云

見藝文志陳玉璣忠佑廟碑記

南唐保大十三年吳越兵侵常守將柴克宏夜夢隋司徒杲

志餘

卷十二

摭遺

四十一

仁告曰吾帥陰兵助公及戰有二黑特衝突吳越兵吳越  
輒披靡克宏乃勒兵繼進大破之克宏奏封杲仁武烈大

帝

十國春秋

舊忠佑廟西偏有柴卽周三公祠柴卽克用劉爲

龍圖閣學士晏周則郡守右文殿修撰杞也三公皆以保  
障吾郡得祔祀於司徒之廟 國初有武進知縣孫公祠  
咸豐間又有向忠武祠皆在忠佑廟西偏焜於兵是宜於  
故址建屋彙祀益以張忠武公國梁名曰六公祠庶乎盡

報德之意焉

毘陵謏聞

宋張彥直字輔之武進人楊吳太尉訓之後累贈至太傅男  
七人由太學聯登崇甯大觀進士第皆歷官通顯彥直就

養二十年年逾八袞與妻俱無恙鄉邦榮之郡守徐仲表

所居里曰椿桂坊蓋取燕山竇諫議詩云

陳邑志

元陳文杰字漢卿武進人授廣元儒學正浙東帥俾二子從

二子挾貴胄無弟子禮文杰扑教二子曰天子有聖旨諸

王駙馬不得擾學校帥聞竦立曰是愛吾也辟爲掾改江

陰知事擢東流尹

梧溪集  
陳府志

勝國劉永祚未仕時夢竈神持三柬肅永祚及其兄熙祚弟

綿祚詣城隍廟神方有公事聞報卽拱而入置酒相款曰

三公一代忠臣後竟驗

陳邑志

徐誥成化甲午舉於鄉少穎慧過目成誦八歲能文十一補

志餘

卷十二

撫遺

四十二

諸生學使以發解期之旣試出學使迎語曰解首被王鼇

奪去矣誥果舉第二

三渦溪文明寺有米海嶽題名石刻兵後尙存碑長四尺寬

二尺凡十五字云陳元老劉巨濟米元章戊辰暮春同遊

遊字末筆回鋒長尺餘有神龍掉尾之勢

毘陵  
謏聞

國初駱挺生太守知常州時徭賦重科條繁多吏緣爲姦前

守屢以積逋去公立法鉤校清積逋吏受成事而已漕運

官常歲餽金三千公曰利若金如吾民何却之諸漕卒皆

斂手奉法

國朝先  
正事略

瞿封公應曉延名師課諸子經潔豐膳敬禮逾常節嘗詣魚

師購鱒魚以供饌而魚僅一尾已入郡守庖乃詣府搗鼓  
自陳郡守分半貽之時人爲之語曰潭潭府淵淵鼓先生  
饌向黃堂取每日夕俟師塾課畢卽偕妻肅拜門外戒館  
僮勿言久之師知感其誠教益力萬厯乙卯二子士達士  
選同舉於鄉士達後成進士官閩藩

瞿氏譜

瞿應曉與龍興寺僧爲方外交僧常言公善人欲寄公舍一  
日僧病剖橘入口而寂是時子士達適生拭口橘瓢宛然

瞿氏譜

瞿步齋孝廉本滋乾隆甲戌會試已中第三名旋以莊殿撰  
培因卷易之閱六十年嘉慶甲戌其孫溶應禮部試父巽

志餘

卷十二

摭遺

四十四

行於榜前夢莊氏先人抱一大杏樹至植於庭曰汝家

故物已而溶果以第一成進士

李玉坡筆記

瞿培字德田重然諾慎取與工詩古文辭在徐州有友貧且  
病培送之歸未抵家卒出橐金爲營斂客黃安六年卒著  
有德田存稿五言如風聲驅石走雨勢挾江飛野水浮牛  
鼻晴沙翹鷺拳初月隱高樹微雨生夕涼百病老方覺一  
身客亦難七言如十數點雨不礙日三四片雲常在天月  
當寒夜疑無色樹近深秋易作聲千重紫塞穿雲背萬里  
黃塵撲馬頭皆驚句也

節林繹光湖北黃安縣志僑寓傳

道光庚寅廣平譚言亂作居民東奔百餘里越章邱至衛河

衛河濱館陶舊治

距今治四  
十里

渡者衆渡夫驚不敢渡以邱亂

告時吾邑張翰風先生宰館陶方與署中諸名士翦獨飲  
舉座惶遽先生曰邛吾鄰邑稔其民情必無之遣役往偵  
而飲如故館陶民亦譌言有變城中鼎沸有覘者至署見  
方會飲乃退遲明偵者返盡得譌言狀越數日而巡撫檄

弁兵四出矣

毘陵  
護聞

湯貞愍之殉難江甯也方賊犯江甯江甯有滿漢官軍六千  
不敷守禦雜調民夫十數萬守之貞愍偕紳士集丁壯爲戰  
守計城守凡十餘日賊掘地道攻儀鳳門城壞賊遂入貞  
愍聞警率民勇及家人赴救至北新菜市猝遇賊命長孫

志餘

卷十二

撫遺

四十五

世佺率民勇前而身爲殿後殺賊頗多賊至益衆世佺身  
被六創民勇力不支遂潰擁貞愍趨淨界寺側李氏宅貞  
愍憤握刀欲自刎會日暮有告者曰賊被滿洲兵逐出城  
矣貞愍喜曰事尚可爲手書致上元令劉同纓請急發粟  
具軍士夜食時居民畏賊各閉戶不出衢市十許里至不  
見一人貞愍遣探制軍提軍皆不知何往傳聞上元令已  
死貞愍曰事不可爲也遂手書絕命辭曰死生輕一瞬忠  
義重千秋骨肉非吾棄兒孫好自謀故鄉魂可到絕筆淚  
難收藁葬毋予慟平生積罪尤以詩付家人家人各環泣  
貞愍曰吾不能效先人手自殺賊不忠不孝惟辦一死從

先人於地下耳家人擁泣不去貞愍曰宅外一池水吾死所也遂出門赴池死時咸豐三年二月十二日子時也明日家人出公尸以絮衾一襲裹而座諸李氏之菜園菜園舊名竹園地近童家山又近雙祠堂故傳貞愍之死在雙

祠堂葬童家山云

本薛子衡撰湯將軍死節事狀

活字版初始於毘陵初用鉛字後乃鋟木見陸深金臺紀聞案沈括筆談云宋慶曆中有畢昇爲活字版不言昇何所或卽毘陵人歟 國朝康熙時刻銅爲活字以印古今圖書集成乾隆間銅木已廢 武英殿印四庫書改用木字純廟御製詩序言其工緻 錫名聚珍近泰西人以藥水描

志餘

卷十二

摭遺

四十六

鉛上自能低陷成字雖省欵刷而印以煤油歲久滲化淡

如無字且多黏而難揭矣

毘陵謏聞

志餘卷十二

摭遺補

蘭陵蕭逸人亡其名嘗舉進士下第遂焚其書隱居潭水上從道士學神仙因絕粒吸氣每旦屈伸支體冀延其壽積十餘年髮盡白色枯而背僂齒有墮者一旦引鏡自視勃然發怒且曰吾棄聲利隱身田野間絕粒吸氣冀得長生今亦衰瘠如是豈我之心哉卽還居鄴下學商人逐什一之利凡數年資用大饒爲富家後因治園屋發地得物狀類人手肥而且潤色微紅逸人得之驚曰豈非禍之芽且吾聞太歲所在不可興土事脫有犯者當有修肉出其下

志餘

卷十二

摭遺補

一

固不祥也今果有奈何然吾聞得肉者食之或可以免于是烹而食味甚美食且盡自是逸人聽視明力愈壯貌愈少髮之禿者盡黥然而長矣齒之墮者亦駢然而生矣逸人默自奇異不敢告於人後有道士至鄴下逢逸人驚曰先生嘗得餌仙藥乎何神氣清悟如是道士因診其脉久之又曰先生嘗食靈芝矣夫靈芝狀類人手肥而且潤色微紅者是也逸人悟其事以告道士賀曰先生之壽可與龜鶴齊矣然不宜居塵俗間當退休山林棄人事神仙可致逸人喜而從其語遂去竟不知所在

唐張謂  
宣室志

嘉靖八年己丑帝親閱廷試卷手批一甲羅洪先楊名歐陽

德二甲唐順之陳東任瀚六人對策各加評獎大學士楊一清等遂選順之東瀚及胡經等共二十人爲庶吉士疏其名上請命官教習忽降諭云吉士之選祖宗舊制誠善邇來大臣徇私選取市恩立黨於國無益自今不必選留唐順之等一切除授吏禮二部及翰林院會議以聞尙書方獻夫等遂阿旨謂順之等不必留并限翰林之額侍讀侍講修撰各三員編修檢討各六員著爲令蓋順之等出張璫霍韜門而心以大禮之議爲非不肯趨附璫心惡之璫又方欲中一清故以立黨之說進而故事由此廢

明史選舉

志

志餘

卷十二

摭遺補

二

江陵奪情編修吳中行檢討趙用賢疏上二人俱受杖卽日驅出國門同官不敢候視許文穆國方以庶子充曰講鑄玉盃一曰斑斑者何卞生淚英英者何藺生氣追之琢之

永成器

湧幢小品蘇州府志

明莊太僕

起元

構濟美堂時傍有賣腐者所居錯宅址中昂

價不售或愆愆公以勢逼之公曰吾爲子孫建百年堂構何得強奪人產賣腐者聞之益昂其價公給值如其言券成復毀之人多爲不平公曰渠屋祇二間居者七口家若饒裕必不戀此數椽也時公五子皆貴各建第於宅左右每房食指無慮數百公徧召五房僮僕令買腐不許之他

店違者重懲久之賣腐者積貲甚饒一日持券詣公曰向蒙盛德願以屋送公辭不受價卒與之迄今五第子孫簪

纓不絕

節莊氏譜逸事

尹文端

會一

節制兩江凡四度德政固多而最得民心在嚴

禁漕弊一事先是有司收漕糧以腳費爲名率一斗準作六七升公初巡撫江南奏明每石令業戶別納兌費錢五十二文而斗斛聽民自槩有遺粒在斛之鐵邊者亦謂之花邊令民自拂去其時有司簽書吏入倉收漕莫肯應也其後桂林陳文恭撫吳胡文伯爲藩司皆守成規弗絲毫假借有某縣令戈姓每石加收一升五合輒被劾坐絞漕務肅清者凡四十餘年皆文端遺惠也宜吳人思公至今猶不置云

志餘

卷十二

摭遺補

三

自來作史必具三長而後選詞宏富抒義精深爲千秋之明鑑良非易易也下逮省志暨郡邑志徵文考獻亦烏可苟焉已哉夫邑志卽一邑之史也山輿地五行以及人物藝文而殿以摭遺紀載宜詳矣而世之秉筆者狃於成見輒謂繁不如簡第簡如新唐書宋子京自謂事煩詞簡炳爲良史後人尙多訾議之信乎秉筆之難其人也吾邑志肇修於前明唐太常凝菴迄

國朝而康熙間兩修之後析武進縣境置陽湖乾隆間董東亭先生成兩邑分志道光間李申耆先生手定合志體例未及告成而卒咸同間邑經寇擾板燬於火光緒三年重修而

志餘

跋

一

論者或從而簡之家廣文俊甫先生曩修邑志嘗於志成後續桑梓潛德錄三集以備參稽今復偕陸彥和明經網羅散失哀輯志餘十二卷補前志之所遺詳新志之所略夫然而都人士快覩爭先攬邑志以溯源流考志餘以見得失俾後來輯志者曉然於繁簡之各當焉昔先大父仲吹公博聞強識熟鄉邦故事嘗校正武陽合志經燹幸存往歲翻印合志以廣其傳蒙俊甫先生遵校本而采錄之并附刻校勘記先大父之手澤賴以不墜焉茲以志餘刻將竣而命善孫序其緣起善孫憶曩時與校新志深以才疎自愧今樂觀此書之成不揣謏陋爲識崖略於後莊善孫謹跋

志餘書後

右志餘十二卷毓鉞手輯以屬陸子彥和纂次考訂越三稔而告成既授梓客有造余者曰武進陽湖之志自李氏合爲一而互見者省矣光緒志省之又省潔於體而略於事有摘其過嚴者矣是書甄補二志卷褻頗富固由蒐討之勤或者矯枉而不適於正乎余曰否志餘非志也其採訪詳確當與志同而書所見以待考體不必備異一也其持擇謹慎當與志同而務盡本末不限行墨異二也其標舉義類當與志同而援引附麗綜會洪纖例廣摭遺文歸有益異三也第責其異糾其枝梧則二志之刪餘過而存之已耳倘參其同道古志餘

卷十二

書後

一

今而述憲典光潛德而證佚文固里乘之緒餘有裨撰述者也既以對客遂書以質陸子并志歲月云光緒十四年仲冬朔日